

Kpashiri Pawlo Kirukate Kalatane Chinanu

Galuklewlu

¹ Pawlo kirukate, wa yokanatkaluru, gi wa yineya gi koxa yineru chinanu, seyni Geso Kristo chinanu ga wa Goyakalu Girchi chinanu. Goyakalunwa Geso yotunkakjeru gipnachinetskalaya. ² Ga wa pejnuruneko moletkakachine wa gitaymalune kirukate. Kalasi gjajene gapatjetachinkaka chinanupa.

³ Gimutkalunepgi. Gidlewan-shinikankaakalunepgi Goyakalu Wuru chinanu ga wa Wutsrukate Geso Kristo chinanu. ⁴ Walenanuko geneknawa wmulochire chinanu, rushatkapyapwu tye mugletgogneya, Goyakalu Wuru gishinikyawaka. ⁵ Gimalwugognenatkaluru rixgognenatinripa. Wane gixkalurupa.

Maleshlu satu pnuko gixachri Kiglerpotununu Tokanchi

⁶ Nuglajita tyeya wa giyampotu wane gixa gixriklekaaka ntomgajeruyegiya, Kristo gimut-lewleya ntomgajeru. Pnuko gixachri tokanchi, gi wa Kiglerpotununu Tokanchiyegitkagi.

⁷ Walenwa gi wa pnuko gixachri. Seyni wanena pimrine gkojwakjenemka. Wanna galuka kashrijetletlu Kiglerpotununu Tokanchi Kristopirana. ⁸ Seyni ginnakokta wixako ga wa tengogne giyakatyachriko towrechri

ginkaklewyegitinipmakgi satu Kiglerpotunaru Tokanchi wa wixa ginkakletanru pnu, kamakpiratkalurunepni. ⁹ Wa muchikawa wchinyawaka, ga wa wane nchinatnaka, wa satu ginkaklewyegitinipmakgi satu Kiglerpotunaru Tokanchi wa gyoptotanru pnu, kamakpiratkalurupni.

¹⁰ Gi rixanu *¿xanigognenanu* yinrege nushinikanuta waka Goyakalu? Waka *¿yinrege* naluka giglenshinikanreta? Yinemka nuglen-shinikanutini, gi wa Kristo wayegrerupmakno.

Kiglerpotunaru Tokanchi Pawlo ginkakletanru

¹¹ Gi rixanu nunkakgi, nomolene, wa Kiglerpotunaru Tokanchi wa nunkakletanru gita, gi wa yineru gishinikyawakni. ¹² Gi rixanu gi wa yineru nyoptotyalu. Gi koxa nunkaaka seyni gipgujetkalurni Geso Kristoya.

¹³ Gi rixanu gixa jemu gita gixjenatyawakapirana, wa Goteyone gixjetyawaka nixanatini. Wa tsru potu kojwaklu nixjenatna Goyakalu gap-atjetanune. Numtukpotutna. ¹⁴ Wa Goteyone gixjetyawaka nkosekya gixo pnuwa gita pixkalune nomolene. Muchkowanshinikanutachripotno nutsrukatenni giykole chinanu.

¹⁵ Wa nunronanwakayakawa ntsomitjeru, ga wa rumutlewleya ntomgajeru Goyakalu kigle getle rixlu ¹⁶ rekakgityaplu Gituru gitaya, wa nunkakletyaplu Kiglerpotunaru Tokanchi Walepirana payineyegiya. Waneklu gi wa nyayegitlu kamaneru ga wa kagragalu. ¹⁷ Gi wa Gerosaleko nkanika wanna yegi wa muchi

yokanatkalune gitaya, seyni Garawichijne nya. Nsatoka. Tamasko nyatnaka.

Pawlo salwayegitlu Petro

¹⁸ Wanepnute, wa mapa walapu giknoginitka, Gerosale nkanika, Sotlu numatinripa. Pamole pamyogogne wale yegi nwa. ¹⁹ Ga wa pimrine yokanatkalune gi neta, seyni Santiyakopje wa Git-srukaachi gepuru. ²⁰ Wa nyonatanru, Goyakalu getanu, gi nayroklewata.

²¹ Wanepnute Surisreta nya ga wa Surisisreta. ²² Mumatgojistikotno Gote gapatjetyachinkaka yegi, wa Kristonune. ²³ Jempiranyegishatnona wane nchinikolu, “Wa muchikawa wkojwak-jejenatjeru, xani runkakletlu Kiglerpotunaru Tokanchi galixlewlupirana wa muchinanu rumtukpotunatanru.” ²⁴ Ga wa gita chinanu rumalwutluna Goyakalu.

2

Pawlo ga wa Wirnawisi gapo nshinikanyegit-kalune payine yegi yokanatkalune rixinripna

¹ Wanepnute, pamole gepkoxamkoje walapu giknoginitka, numepe Gerosale kanikletatnaka Wirnawisiyma. Naniikoxlu Tito rupxaletyapno.

² Wa nupgujetikowaka nkanika, wa payine yegi nunkakletanru Kiglerpotunaru Tokanchi, wanna mkoje nunkaka wa kigle getle gixkalune, gimka maleshawaka nkamrurewatirni ga wa nkamrurewatinitka. ³ Seyni wa nupxalu Tito, Kriykomkani gi wa sajruka gistaakota wale. ⁴ Wa moletkakachine sanowashatachine chinanni yoshmakanachinwa pochkeruneko. Wanna

jiglokyegitwu giruktatyapluna wushpakyawaka Kristo Geso chinanu, wayegretyapmawkwuna.
5 Gi wa pshinitsonuji wuyagolewna wannaya wa wyijnakotyapna, gixa yegi rawgognenatinripa galikakpotunananu tokanchi wa Kiglerpotunananu Tokanchipirana.

6 Wanna kiglepiranyegirune kagwaakalune, gi pixkalunekokta rixna gike rixno (Gi wa manewle giglenu chinanu yoptyaplu yineru wa Goyakalu), gi rixanu wanna kiglepiranyegirune kagwaakalune gike yognikyanona. **7** Seyni pnuko rixka. Wa retinitkanona gaponshinikanyegitkalurno wa Kiglerpotunananu Tokanchi nunkakyapna msajruka gistaakotkone, Petroko pixka runkakna sajruka gistaakotachine. **8** Gi rixanu Goyakalu wa Petroya kamrurewatyachri wa sajruka gistaakotachinyegiya wa yokanatkaluru rixinripa, Waleko gitkoxaya kamrurewatyay payine chinanu. **9** Rumatluna wa gimutlewlu wa nenezikolu. Guyagni wanna Santiyako ga wa Sotlu ga wa Gwa, wa yoptyowaka gajerustsigi pixkalunni kagwakikalune, romyokyegitwuna gita ga wa Wirnawisi potuklemyotna, wumatkaakalu chinanu. Wane rixna, wa payine yegi nyinipa gita, ga wa wanna sajruka gistaakotachine yegi yinripna. **10** Walepje wa kwamonurune rushinikjixwuna. Jmererunpotwu wkamrutyaplu waleko.

Gantiyokiya Pawlo ginkakyalu ruklukanuwnin-riya Petro

¹¹ Wa Sotlu Gantiyokiya yinitka gigojipotuko nsatkaklu gi rixanu ruklukanuwna. ¹² Gi rixanu ma mapookanuwana Santiyako yegi giyakatyachine, wale payine gimnika. Wa rapokinitkana rixashata. Ruxrikamtatka. Gi rixanu sajruka gistaakotachine pika. ¹³ Waleyma koxa rixashatna pimrine Goteyone. Wane rixatka Wirnawisiko pupjekaaka wanna gixashle chinanu.

¹⁴ Seyni wa netinitkana gi wa potukyaletkana; gi wa Kiglerpotunaru Tokanchi galikakate chinyawaka pixka rixna, wane nchinru Sotlu pejnurune getanu, “Wa pixa Goteyokyti wa payineko gixjetyawaka pixka pixini; gi wanna Goteyone gixjetyawaka pixka pixini, ɿklu chinanu perutna payineko wa Goteyone gixjetyawaka pixka rixinripna?

¹⁵ “Wixni wa Goteyonwu wumumturetanru wixinri, gi wa payine kmukochirerunwu. ¹⁶ Wumatlu wa yineru gi wa muklukanuw-nakaakotni wa Tokanchi Yukanatkaluru kamrutikolu chinanu, seyni Kristo Geso galixikolu chinanu muklukanuwnakaakotni. Ga wa wixa galixlu Kristo Geso wa muklukanuwnakaakonepwu Kristo galixikolu chinanu, gi wa Tokanchi Yukanatkaluru kamrutikolu chinanu. Giyagni Tokanchi Yukanatkaluru kamrutikolu chinanu gi pamanena muklukanuwnakaakotupni.

¹⁷ “Ga wa wixa gjiginri muklukanuw-nakaakonwu wixinripa Kristoya, ga wa wixako kmukochirerunwu getikolunwu, ɿwale chinanrege mukochri kamrurewatyachri Kristo? Gike rixiniko. ¹⁸ Gi rixanu wa

nnikatanrukaka nkamrutinitnaka, nekakgitnawa ginanshichkaluru kamrutachrino. ¹⁹ Gi rixanu gita Tokanchi Yukanatkaluru chinanu nupnanatka Tokanchi Yukanatkaluruya, Goyakalu chinanu nuwekinripa. Kristoyma koroshishkita nutaaka. ²⁰ Giyagni gi wa gita giwekatka, seyni gita ruwekyatka Kristo. Ga wa xawakni nomaneyna nuwekinritka, Goyakalu Wgene galixikolu chinanu nuweka. Walenwa nushinikjeru. Walenanuko geneknawa gita chinanu. ²¹ Gi wa maleshawaka nixkaklu Goyakalu gimutlewle. Gi rixanu wa Tokanchi Yukanatkaluru chinanupmakni wa poyagkaklewlu, waneklu maleshawakmaka rupnana Kristo.”

3

Giwekikaluru galixluya yoptotikolu

¹ Kalatane mshinikanungi, ¿katu yokshatgi? Gixaygale getanu rupgujewnakaaka Geso Kristo koroshishkita gitaaikaluru. ² Walepje naluka gimatletyagi: ¿Waka Tokanchi Yukanatkaluru kamrurewle chinanu gyoptotluge Giwekikaluru, waka gyijnakotinri galixluya chinanu? ¿Gi pamshinikanunangige? ³ Wa Giwekikaluru gyinuwakinikta, ga wa xani ¿manchi chinanrege mmagatikanepgige? ⁴ ¿Wane pejnurge maleshawaakaka nsalewniya gixa wa galikaka maleshawaka rixinipmaka? ⁵ Giyagni wa Goyakalu wa Giwekikaluru genekpotutyagi ga wa gixa yegi giyaklewlu kamrurewatyachri ¿waka

Tokanchi Yukanatkalu kamrurewlege chinanu waka gyijnakotinri galixluya chinanu?

Galixachine wannanwa Gawraklopishane

⁶ Waneko pixka rixa Gawra. *Goyakalu ralixa, ga wa wale chinanu rutakyegitka poyagkakachri rixinripa.* ⁷ Giyagni gixa gimata kalixaklerune wannanwa Gawraklopishane. ⁸ Wa yonatkaluru tokanchi rumatagnaputika wa galixlu chinanu Goyakalu muklukanuwnakaakone gitakyapna payine. Giyagni Kiglerpotunau Tokanchi runkakagnaputlu Gawra. Wane china, “*Pixaya giglenshinikanyegitkalunepni pejnuruneko payinemnunanuka.*” ⁹ Giyagni kalixaklerune giglenshinikanutkalunepni wa kalixakleru Gawraymananuko.

Kristo wenutlu wushpakinripa wa Tokanchi Yukanatkalu kamakpiireyegiya

¹⁰ Gi rixanu pejnuruneko Tokanchi Yukanatkalu kamrureyegirune, wannanwa kamakpiratkalune. Gi rixanu wane chinyongata, “*Kamakpiratkalunni pejnuruneko ginnakokta gi gomkagi kamruretyalu pejnuruko yonatika Tokanchi Yukanatkaluuya.*”

¹¹ Giyagni pgujerni wa Tokanchi Yukanatkalu chinanu gi pamanena muklukanuwnakaako-tupni Goyakalu getanu. Gi rixanu: *Wa poyagkakachri giwekanu ralixleya chinanu.* ¹² Ga wa Tokanchi Yukanatkalu gi wa galixluyni, seyni wa wale kamrutachri ruwekanu waleya chinanu. ¹³ Kristo wenutlu wushpakinripa wa Tokanchi Yukanatkalu kamakpiiryegiya. Wixa chinanu kamakpiratkalurni Wale. Gi rixanu

wane china yongatyawaka, “*Kamakpiratkalurni girukokta gagmunashkita gixripkaakaluru.*”

¹⁴ Payineko rapyegitimripa wa Gawra giglen-shinikanyegitimkolu Geso Kristo chinanu, wa galixlu chinanu wyoptotyaplu Giwekikaluru gipiratkaluru.

Goyakalu gipiratyalu Gawra

¹⁵ Nomolene, yineru gixjetyawakapirana nunkakangi: Wa gipiratkaluru kirukate gike rixa yinerunupmakni, wa poyegitkalurni pejnurune getanu, gike giknoktokanutlu. Gike wanepnute yognikinri. ¹⁶ Ga wa gipiratkaluru tokanchi wane china, “Gawranupa ga wa giklopishanupa.” Gi wa wane china, “Wa giklopishanenupa,” wa gixolurunenupa pixka, seyni satupjenupa pixka, “*Wa giklopishanupa,*” china. Walenwa Kristo. ¹⁷ Goyakalu gipiryegitlu Gawra renekyawakaplu. Wanepnute, ruknoginitka gepkoxamkoje pacha mapmole walapu, Goyakalu genekna Gisrayiline Tokanchi Yukanatkalu. Giyagni tyenwa nchina, wa Goyakalu gipiratanru gi rumkata giknoktokanreta wa Tokanchi Yukanatkalu. ¹⁸ Gi rixanu wa Tokanchi Yukanatkalu chinanupmakni wa yoptotikalurupa, waneklu gi wa gipiratkaluru tokanchi chinanupmakni. Ga wa Goyakalu wa gipiratkaluru tokanchi chinanu genekashatyalu Gawra.

¿Klu chinanu wa Tokanchi Yukanatkalu?

¹⁹ Giyagni ¿klu chinanu wa Tokanchi Yukanatkalu? Wa mukochri chinanu yogniika rapokinpotunanuko giklopisha gipiryegitkaluru. Towrechinea rutaaka. Kgiykoylewaklerumyo

rawanata. ²⁰ Ga wa kgiykoylewakleru gi wa satupje chinanni. Seyni wa satupjerutni wa Goyakalu.

²¹ ¿Giyagnige wa Tokanchi Yukanatkaluru kamnixlu wa Goyakalu gipiratanru? Gike rixiniko. Gi rixanu Tokanchi Yukanatkaluru gimkata giweekaklewatachripmaka, waneklumka poyagkaklewlu galikaka Tokanchi Yukanatkaluru ruyakatinmaka. ²² Seyni Tokanchi Yonatkaluru chinanu kmukochrirerunwu pejnurunekwu, wa gipiratkaluru galixachine renekikolupa Geso Kristo galixikolu chinanu.

Satupjerunetkawu Kristo Gesoya

²³ Wa ma mapookanuwa galixlewlu, gi wumkata gishpakleta kmukochirerune wixinriya wa Tokanchi Yukanatkaluru chinanu wa wunkaakoklunpotunanuko galixlewlpipirana.

²⁴ Giyagni wyimakjerni wa Tokanchi Yukanatkaluru, wa Kristo yegi ranikyapwu, muklukanuwnakaakone wixikolupa galixlu chinanu. ²⁵ Ga wa rapokinitka galixlewlu, gi wa yimaklewatachri wyijnakotatka.

²⁶ Gi rixanu pejnurunekgi gixa Goyakalu wgenenetkagi Kristo Geso galixikolu chinanu.

²⁷ Gi rixanu pejnurunekgi gixa Kristo chinanu katkalungi, Kristo gmakatnawa. ²⁸ Maleshlu Goteyo, gi wa Kriykoko. Maleshlu wayegrechri, gi wa gishpakachriko. Maleshlu jeji, gi wa suxoko. Gi rixanu pejnurunekgi gixa satupjerunetkagi Kristo Gesoya. ²⁹ Ga wa gixa Kristonune nchininitka, waneklu Gawraklopishanetkagi,

wa gipiratkaluru tokanchi chinyawakpotuko wa
yoptotachinepa gixinri.

4

*Gi wa wayegrechinetkawu, seyni
wgenchinetkawu*

¹ Xani yoptotachinepapirana nunkakangi. Galukta satu yineru gitaaikaluru ruru wane gixle yoptotachripa, seyni mturu rixiniwa. Wa mturu rixinikopshini, satu wayegrechri pixka gixkalurni. Gike rixa pejnuruko gitsrukatzmakni. ² Mturune girukotachine yijnakota wale ga wa panchi girukotachine, wa ruru gitakanrugogne rapokinpotunanuko. ³ Waneko pixka wixanatini. Wa mturune pixka wixini tyegogne gajerkaka wayegretanatwu. ⁴ Ga wa poyagkakgognepotutinitka, Goyakalu yokanatlu Gituru, suxo giyakatyachri, Tokanchi Yukanatkaluru yijnakotachritkani, ⁵ wa koshpakyapna Tokanchi Yukanatkaluru yijnakonatachine, Wale wgenene wutakikolupa. ⁶ Ga wa gi rixanu Goyakalu wgenetkawu, Wale yokanatlu Giwekikaluru Giturunu waji saplewatinripa, “Gawwa.” (Nuru.) ⁷ Giyagni gi wa wayegrechritkayi, seyni Goyakalu wgenetkayi. Ga wa Wale wgene pixinri yoptotachrikoxapyi Goyakalu chinanu.

*Wuykotka wma wayegretikotpatnaka Tokanchi
Yukanatkaluruya*

⁸ Seyni muchikawa wa Goyakalu gma mumatkanuwa, wayegrechinengi wanna yegi wa goyakalunemigjene rumumturetanruna.

⁹ Ga wa xawakni gimatatkalu Goyakalu, ga wa galikakni Goyakalu gimataganung. ¿Gi gixpoko satokleyegitanutnaklu tyegogne gajerkaka? Walenwa muchkotkaka ga wa magatachrikaka. Wa wale wayegrene galuka gixletatnaka. ¹⁰ Gimretpotutlu gogkaka, ga wa ksurkaka, ga wa gipapkokaka, ga wa walapkaka. ¹¹ Nkagwakpirata gixa chinanu gimka maleshawaka nyaprewanatinri gixyegiya.

Pawlo chanixna Kalata gajene

¹² Nomolene, nagjitgi gita pixka gixanu gi rixanu gixa pixkalutkoxno gita. Gi satuna gimtukyano. ¹³ Ga wa gixa gimata wa nugrokmanetinri muchinanu Kiglerpotunaru Tokanchi nunkaklewyegitgi. ¹⁴ Wa gyantaletikolu nomaney, gi wa geyikyano. Gi wa gagnanutyakoxno. Seyni gyoptotno satu Goyakalutowreru pixka, Kristo Geso pixka. ¹⁵ Guyagni ¿ginakatkalu wa giglenshinikanyegitimolu? Gi rixanu nupgujtatgi wa gimkatiniplu giygalejiko gkoshpakyapmaka genekyapno. ¹⁶ Guyagni ¿gkamnixjerutkange gita gi rixanu tokanchi galikakpotunaru nunkakgi?

¹⁷ Wa wanna muchkowanshnikanyegityagi gi kigleru. Seyni raluka gishyayegletgina gma jiglokinitipa, wa wannako gmuchkowanshnikanyegitinripa. ¹⁸ Kigleru wa gmuchkowanshnikangognenatinripa wa kigleruya. Gi wa gixa yegi nwinikopshinipje wane gixanu. ¹⁹ Nwugenene, nchinowyegitatnakgi wa gixa gaji kamgikolpotunanuko Kristo. ²⁰ Nalukmaklu gixa yegi nwinripmaka wa

xani wa nkashrijetokanutinripa, gi rixanu gi numatanshinikanyegitgi.

Yapkaklu Sara ga wa Gakarapiranaya

²¹ Ginkakanno, gixa Tokanchi Yukanatkaluru galuka yijnakletachingi, *¿gi ge gjemu Tokanchi Yukanatkaluru?* ²² Gi rixanu yonatkalurni wa Gawra waneylu gepi wgenene. Satu wa wayegrechroya, ga wa satu wa mwayegretkotoya. ²³ Seyni wa wayegrechroya guyakatyachri manchi pixka gixachri rushpaky. Ga wa mwayegretkoto guyakatyachri gipiratkaluru tokanchi chinanu rushpaky.

²⁴ Tyekakaktanwa yaglu. Gi rixanu wanna suxonni wa gepi gipiratkaluru tokanchikaka yaglu. Satni wa Sina Magkate guyakatyachro. Wala wugenetna wayegrechinepa. Walanwa Gakara. ²⁵ Ga wa Gakara walanwa Sina Magkate yaglu. Garawichijne gajeru magka. Wa xawakni Gerosaletka pixkalutni, twugeneneyma wayegrechroni. ²⁶ Ga wa teno gajeru Gerosale gishpakachroni, walanwa wunro. ²⁷ Gi rixanu yonatkalurutkani:

Pumuwatanu, migato, wa pixa mwugenetonanyi.

Pupsheka siplewletanu,

pixa wa ma chinyegityi.

Gi rixanu kganururo pnute

gixo wgenro wa gapalushanatachro.

²⁸ Ga wa gixa, nomolene, Gisaaka pixka gixa gipiryegitkalungi wgenchingi. ²⁹ Seyni walegogne pixka wa manchi pixka gixa gishpaketachri kojwaklu wa Giweikaluru pixka gixa gishpaketachri, waneko pixka rixa wa xani.

³⁰ Seyni *¿gi china wa tokanchi yonatkaluru?* “*Puknokanro wayegrechro ga wa toturuyma. Gi rixanu wa wayegrechro wgene gi wa yoptotachripni wa mwayegretkoto wgeneyma.*” ³¹ Giyagni, nomolene, gi wa wayegrechro wgenenwu, seyni mwayegretkoto wgenenwu.

5

Gishpakyawaka ntunwatanu

¹ Giyagni wa gishpaklewluya wa Kristo kosh-pakyawu, ntunwatanu. Gi gkashichkotnaka wa wayegrechine gixinripa, wa gitjipije ganikachine pixka gixinripa.

Gimutlewlu yegi gitskikyachine

² Seyni gita Pawlono wane nchingi, wa nsajruka gistaakoklunupa gike rupxakingi Kristo. ³ Numepe gipgujtalyegitatnaklu satkaka yineru wa sajruka gistaakoklunupa, wa wale gimkata kamruretlu pejnuruko Tokanchi Yukanatkaluru. ⁴ Kristo kaspukachinetkagi ginnakokta wa Tokanchi Yukanatkaluruwa muklukanuwnakaakonepmakgi. Gimutlewlu yegi gitskikyana. ⁵ Ga wa wixa Giwekikaluru chinanu ga wa walixle chinanu wkagwakpotutlu wa poyagkakachine wutaako. ⁶ Gi rixanu wa Kristoya gike gimkatachrini wa sajruka gistiklewluy, gi wa msajruka gistaaknuchiko, seyni galixlu galikakni wa gishiniklewluy kamrurewatayachri.

⁷ Kigle gixjenata. *¿Katu gimaletgi wa gma malixyanuplu tokanchi galikakpotunamu?* ⁸ Tye gishinikanutikolu gi wa ntomgajeru ruyakaty.

⁹ Ptsotsotaji gisekachri psolujpako ruseekaka.
¹⁰ Gitsrukaachi naponshinikanyegitgi, gi wa pnuko gyanshinikanutanu. Ga wa gkojwakjeru girukokta rixinri waneyaplu ruklukanuwnayegjixikolupa.

¹¹ Ga wa gita, nomolene, wa nunkakletinmakawalu sajruka gistiklewlü, ḡklu chinanu nkøjwaakawa? Gi rixanu wane nixinipmaka koroshishkita gitspekaklewatinriya nkaspukikmaka. ¹² Nalukmaklu wa gkojwakanshinikanutjene rustakinwana.

*Tokanchi Ykanatkaluru poyagkakikolu
walenwa gishiniklewlü*

¹³ Gi rixanu gixa, nomolene, tomgakalungi gishpakikolu chinanu. Seyni wa tyepje, wa Tokanchi Ykanatkaluru gishpakinriya gi wane gixikolupa ruglepoktapinri gimane galukyawaka chinanu. Seyni gishiniklewlü chinanu wayegretkaakalunepgi gixkakluko.

¹⁴ Gi rixanu pejnuruko Tokanchi Ykanatkaluru patokanchipje poyagkakikolupa. Tyenwa wale: *Pushinikanru pumwastsitanru pixnanuko pixka*.

¹⁵ Gi rixanu gixkakluko gashkakakanmaka ga wa gniikakanmaka, xakoka gnikatpotkakapa.

Wa manchi kamrure

¹⁶ Giyagni wane nchina, Giwekikaluru gyanini, ga wa manchi getsotanrewle gi wa mpoyagkakanu. ¹⁷ Gi rixanu wa manchi getsotanrewata, kamnixyalu Giwekikaluru. Ga wa Giwekikaluru getsotanrewata, kamnixyalu manchi. Gi rixanu manchi ga wa Giwekikaluru kamnixkaka, gixa gma kamrutyuanuplu

galukanrukaka. ¹⁸ Ga wa Giwekikaluru kosekanungi gixini, waneklu gi wa Tokanchi Yokanatkaluryegirungi.

¹⁹ Gi rixanu pgujerni manchi kamrurkaka. Walenwa gapoklewlu, mpowrannuchi, mpogijpatnuchi, ²⁰ yagluchisha yonogyegru, kagonchiwlu, kamnixlewlu, yagotkaklu, ganxalewlu, gimtuwakchi, gimkapnuglu, kotspalan Shinikanrewlu, pnuko gixachri ginkaklewlu, ²¹ sotanugnuchi, gimru, tsru niklu, ga wa wane pixkalutkaka. Wale nunkakagnaputatnakgi, wa muchikawa pixka nixa ginkaklegnaputgi, wa kwangixaklerune gi yoptotanruna Goyakalu pogirewatyawaka.

Wa Giwekikaluru kamrure

²² Ga wa Giwekikaluru kamrure walenwa gishiniklewlu, ga wa gimuwlu, ga wa giglewanshinikanrewlu, ga wa ma pognanrewlu, ga wa shinikannuchi, ga wa giglewlu, ga wa galixlewlu. ²³ Ga wa mayognuchi, ga wa girukotmanrewlu. Maleshlu tokanchi yokanatkaluru walekaka gjretikolupa. ²⁴ Ga wa Kristo Gesonune koroshishkita rutakmanewletna gimane galuklewlekakaymana ga wa retsotanrewleymana. ²⁵ Wa Giwekikaluruya wuwekini, Giwekikalurkoxaya wyanini.

²⁶ Gi wa wujganru maleshawaka walixkotikolupa. Gi wa wayookakanu. Gi wa wanxakakini.

6

Gimutjikakanu

¹ Nomolene, wa satu yineru gakajipgaka satu mukochriya, gixa wa Giwekikaluru waneyalungi gigletanru wane gixachri, mayogonshinikanurunepgi. Pixnanuko petinwa wa pma yantaletikotupa pixa. ² Gimutjikakanu. Wane gixini mpoy-agkakanru Kristotokanu yokanatkalu.

³ Gi rixanu walenanuko kagwaknachriwa pagixanu rixinri, ga wa gikenanni, waleko ginshinikanu yokwitnawa. ⁴ Giyagni satkaka gitakyagoka kamruretinwa. Waneklu ralixkotko wa walepje chinanu, gi wa satu chinanni. ⁵ Gi rixanu satkaka waleko wunnu rutjitanu.

⁶ Ga wa yimaakalurune pejnurkakako kigleru gapikanna wa tokanchi yimaklewatachine.

Wa yineru gitakanru wale koxa jirganu

⁷ Gi wa yokwitkalunepgi. Gi wa gapnokatkurni Goyakalu. Gi rixanu wa yineru gitakanru wale koxa jirganu. ⁸ Giyagni wa gimane chinanu gitakachri, gimaneya jirganru gamgikowaka. Ga wa Giwekikaluru chinanu gitakachri, Giwekikaluru chinanu jirganru giweklu gike rixiniko mnikawnakatu. ⁹ Gi wamanutanu kigleru wkamrutinri. Gi rixanu gipapko wjirgalewatanu wma mugrokanupa. ¹⁰ Giyagni wa ruglepoktapini wchinini, kigleru wkamrutinna pejnuruneko, ga wa muchinanu gapka galixlewluya moletkakyachine.

Kristo koroshishkiteya ralixkowata Pawlo

¹¹ Getanru. Tsru yonga potu gitako nomyo nyonatinri.

¹² Ginnakokta galuka kigle getikolupa gimaneya, wanna gerutgi wa nsajruka

gistakikolupa. Walepje chinanni wa ma kojwakikonepni Kristo koroshishkitate chinanu. ¹³ Gi rixanu gi wannako sajruka gistaakotachine kamrutlu Tokanchi Yukanatkaluru. Seyni ralukluna gixa sajruka gistakikolupmaka, ralixkowatinripmakna gixmaneya. ¹⁴ Ga wa gita gike rixiniko nalixkowatanutka, seyni walepje Wutsrukate Geso Kristo koroshishkitateya. Wale koroshishkitate tye psolchijneko koroshishkita gitaakaluru gitanshinikanuya. Ga wa gita Kristo koroshishkitate gitaakalurno tye psolchijneko chinanu. ¹⁵ Gi rixanu gike gaprini wa sajruka gistiklewlulu. Gi wa msajruka gistiklewluko, seyni gerotu guyakotkaluru galikakni. ¹⁶ Ga wa ginnakokta tye nuykolewle kosekyachine, giglewanshinikanutachinepni, ga wa getwamonutkalunepni. Ga wa Goyakalu Gisrayilitene koxa waneko pixka rixa giglewanshinikanutachinepni ga wa getwamonutkalunepni.

¹⁷ Xaniyakawa gikena yaprewkakanutkano, gi rixanu nomane nanikyalu Geso gimaxikolkaka.

Giglewanshinikanutachinepni

¹⁸ Nomolene, gixaymaplu Wutsrukate Geso Kristo. Wale gimutangi. Wane gixkalurupa.

Gerotu Tokanchi Gipiratkaluru New Testament in Yine

copyright © 2008 Wycliffe Bible Translators, Inc.

Language: Yine

Translation by: Wycliffe Bible Translators, Inc.

Yine [pib], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yine

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

5c761e81-2e6f-5161-be9d-dbc456a2816b